



SIARAN MEDIA KEMENTERIAN PERTANIAN DAN KETERJAMINAN MAKANAN

BEKALAN TERNAKAN KORBAN MENCUKUPI MENJELANG SAMBUTAN HARI RAYA AIDILADHA TAHUN 2025 (1446H)

PUTRAJAYA, 3 JUN 2025 – Kementerian Pertanian dan Keterjaminan Makanan (KPKM) menjangkakan bekalan ternakan untuk sambutan Hari Raya Aidiladha di seluruh Malaysia bagi tahun 2025 adalah **mencukupi dan dapat memenuhi permintaan**.

Mengikut statistik daripada Jabatan Perkhidmatan Veterinar (DVS), stok bekalan lembu/kerbau tempatan sehingga Mac 2025 adalah 35,581 ekor manakala bekalan lembu/kerbau yang diimport sehingga Mac 2025 adalah sebanyak 3,223 ekor. Jumlah keseluruhan bekalan untuk lembu/kerbau bagi tujuan korban adalah 38,804 ekor.

Bagi kambing/bebiri, stok bekalan tempatan sehingga Mac 2025 adalah 26,845 ekor manakala bekalan kambing/bebiri yang diimport sehingga Mac 2025 adalah sebanyak 3,322 ekor. Jumlah keseluruhan bekalan untuk kambing/bebiri bagi tujuan korban adalah 30,167 ekor.

Mengambil kira keperluan masjid, surau dan rumah sembelih, anggaran permintaan lembu/kerbau untuk korban adalah dijangka sebanyak 34,451 ekor manakala permintaan bagi kambing/bebiri sebanyak 22,453 ekor. Justeru, jumlah keseluruhan bekalan ternakan adalah dianggarkan mencukupi bagi menampung permintaan sembelihan bagi tujuan korban tahun 2025.

Sebanyak 27 buah rumah sembelih milik DVS di seluruh Semenanjung Malaysia sedia untuk beroperasi bagi tujuan penyembelihan ternakan korban. Di samping itu, DVS juga telah mengeluarkan lesen kepada 40 buah rumah sembelih swasta di seluruh Semenanjung Malaysia yang boleh memberi perkhidmatan penyembelihan bagi tujuan korban.

Selain itu, bagi tujuan penyembelihan korban yang ingin dijalankan di luar rumah sembelih seperti di masjid, sekolah, taman perumahan, tempat awam dan lain-lain

tempat, permohonan permit penyembelihan luar yang disertakan dengan dokumen-dokumen yang berkaitan adalah diperlukan bagi mendapatkan kebenaran.

Orang ramai juga digalakkan untuk merujuk kepada Garis Panduan Penyembelihan Ternakan Korban yang telah dikeluarkan oleh DVS sebagai panduan asas dalam melaksanakan aktiviti penyembelihan ternakan korban.

Dikeluarkan oleh:

KEMENTERIAN PERTANIAN DAN KETERJAMINAN MAKANAN

